

The Ying Hwán Chi Lish, or  
General Survey of the Maritime Circuit;  
a Universal Geography.

By Li Ki-yü, Gov. of Fukkien.  
Vol. V.

France, Spain, England, Portugal.  
Book 7

116-1  
20



Folio  
PL2724  
.H86  
v.5



✓  
Chi-yü Hsü

Ying huan chih lüeh



佛郎西圖



海中地





英吉利界

大西洋

西班牙









佛郎西國

佛郎西

佛蘭西○法蘭西○佛郎機○佛朗機○佛朗祭○荷蘭西

歐羅巴強大之國也東北

界比利時西北與英吉利隔海港相對東界日耳曼瑞士東南界

意大里亞暨地中海西抵大西洋海西南界西班牙縱約二千二

百五十里橫約二千六十里其地古名舉盧又名牙里亞為塞爾

達野番部落漢孝元元初年間羅馬大將愷撒征服之

愷撒一作人畧塞薩

爾命大臣鎮守墾田播穀漸化其俗由是為意大里亞西境後羅

馬衰亂南境為北狄維西哥多人

即戎特族

所據西境為北狄不爾給

農人所據東北境為日耳曼之佛郎哥人所據齊高帝建元三年

佛郎哥酋長哥羅味有雄畧始驅除北狄據其全土改國號曰佛



郎西是為佛人立國之始傳三百餘年至給爾北里哥為國人所

廢唐天寶十一年立國相北比諾為王一作鎚北比諾聰敏好學奮

起修政佛國以康其孫甲利泰甫一作加爾祿有文武才於唐德

宗六年嗣位時東方日耳曼之撒遜部屢犯邊泰甫征之禽其王

斬四千五百人因畧定日耳曼諸部并兼羅馬羅馬教王為加冠

時天主教王有大權加冠者立為霸主之意羅馬東王約為上交泰甫乃開館第招致

文學之士城邑宮室道路創造閎整規模極一時之盛泰甫傳數

世後宗支爭權各部亦擅兵相攻國又衰亂宋太宗雍熙四年國

人立大酋武額加頒多為王傳數世嗣絕更立瓦羅義斯為王宋

理宗二年王路易一作盧嗣位長於吏術尤精名法嘗帥師伐麥

義斯



西戰已勝矣。而三軍染疫不能起。乃納賂全軍歸。而增修國政。簡任賢能。號為中興。國與英吉利隔一海港。世為姻婭。當佛王嗣絕。英吉利王義都亞爾多。一作華義都第三自以佛故王之甥。當得分地。佛人不與。英吉利遂起兵相攻。兩國從此構釁。隔數年。或數十年。輒交。閔稱為勍敵。元順帝年間。國為英吉利所滅。有幼女。年十六號召餘燼。擊退英軍。恢復境土。明萬曆二十五年。王顯理被弑。一作英黎

給顯理第四

一作英黎給第四

由旁支嗣位。發奮自修。廣布仁惠。百姓歸

之時。有天主教之魁。欲誅鋤異己。王不聽。魁恨之。謀弑王。萬曆三十七年。王中刺客死。百姓哀哭如喪父。嗣子愚孱。用小人。國政亂。傳至路易第十四。一作盧義斯第十四好武佳兵。諸國來朝者。偃蹇凌侮之。



由是皆怨畔。乾隆三十八年。王路易第十六

一作盧義斯第十六

嗣立。時華

盛頓

一作兀興騰

據亞墨利加起兵。英吉利攻之不克。佛人以全軍助

華盛頓。英不能支。遂與華盛頓和。而佛亦由是虛耗。王好漁色。內

寵擅權。擾民。民不能堪。乾隆五十四年。國大亂。尋廢王弒之。立領

事官三人攝王政。以拿破侖爲首。

一作拿破利翁又作那波良

拿破侖者。佛風

將。用兵如神。征麥西有大功。王忌之。置散地。國人既弒王。拿破侖

乘勢鼓衆。得大權。嘉慶八年。國人推戴卽王位。恃其武畧。欲混一

土。宇繼羅馬之蹟。滅荷蘭。廢西班牙。取葡萄牙。兼并意大利。瑞士

日耳曼諸小部。割普魯士之半。奪奧地利。亞屬藩。侵噠國。圍其都

城。戰勝。攻取所向無敵。諸國畏之如虎。嘉慶十六年。以大兵伐我



羅斯圍其舊都墨斯科。我人燒之而走。佛方旋師而天驟寒。軍士凍死者十七八。諸國乘其敝也。合力攻之。佛師大潰。故所得土全失。嘉慶二十年。各國遣公使會議於維也納。舉地利亞都城凡拿破侖所侵地。各歸故主。其間有合併立盟約。不相吞噬。拿破侖既敗喪。慙而避位。復立故王之裔路易。一作盧義斯仍握兵柄。嘉慶二十一年。與英吉利戰於北境。兵敗被禽。英人流之荒島。道光二年死。路易卽位數年卒。弟查理立。一作加爾祿斯愚戇不任事。在位九年。國人廢之。擇立支屬賢者路易非立。一作盧義斯非里卑卽今在位之王也。以道光九年嗣立。性寬仁。好納諫。有賢聲。

佛郎西地形平衍。東境與諸國接壤之處。有連山斷續。南界與西



班牙隔比里牛斯大山。餘皆平土。境內河道縱橫。著名者二十有二。最大者曰羅尼。自北而南入地中海。曰塞納。曰羅亞爾。曰日倫。大皆自東而西入大西洋海。佛人多開支河爲運道。佛人水利最精其國以此爲專門之學處處可通舟楫。又多開溝洫資蓄洩。以故壤地之腴甲於西土。田畝得六。園林得二。牧場得一人。授田不過數畝。而農功最力。故戶口多而食常足。西北氣候頗寒。土卑濕。宜稼穡果實。東南溫燥。多草木。宜葡萄酒。南方之民多以釀爲業。味極醇。色淡黃微赤。極清。味似中國北方黍米所釀。斟之起沫。一餅有值洋銀數十圓者。西土良醪皆取給於佛。歲得價銀六千餘萬圓。又造熱酒。歲得價三百萬圓。產橄欖油極多。種萊菔造糖。味同於蔗。所織大呢羽。



緞皆精緻。又能織花紋絲緞。本國歲產蠶絲十萬餘担。不足供機杼。仍由意大利販運。益之。其人心思精敏。工於製器。自來火之鎗。火輪之車。船大半皆其所創。都城有鐘表匠二千人。每歲造時辰表四萬件。自鳴鐘一萬八千架。其法時時變易。奇幻出人意料。他國亦有倣造者。而終遜於佛山產石炭鐵鉛白礬。僅供國用。其民俗豪俠。自喜氣高亢。終日歌舞無戚容。貴賤皆衣裳都麗。不惜費喜交遊。善遇遠人。每年收各項稅銀約一萬二千九百萬兩。國舊分三十三部。因其廣狹不均。近年改爲八十六府。○壹里亞德佛蘭薩部在北境東西適中之地。今分五府。首曰塞納。都城在其中。曰巴勒。一作帕爾勒士。又作巴黎斯。建於塞納河兩岸。城垣方廣。居民九十餘



萬王居殿闕巍峩。層樓複閣相望。文彩精麗。西土始無其比。城外  
離宮別苑。歷代陸續修建。凡數十處。其街衢盤繞環匝。列肆密如  
蜂房。往來者輻擊肩摩。晝夜不絕。每歲京都所收稅銀。計九百萬  
兩。歐羅巴都會之盛。推爲第一。城內有大書院。藏印本書三十六  
萬冊。鈔本書七萬冊。遊學之士。許住院借讀。又設醫院十四所。選  
名醫居之。每歲收療病者一萬四千人。各國學醫者。皆裹糧赴巴  
勒。三年或五年。學成然後歸。又有繁術院。居各項藝術之師。如學  
兵法。開河道。造器物之類。學者各就所願。羣居講肄焉。次曰疴瓦  
斯。在塞納之北。首邑名波威。曰哀斯尼。在疴瓦斯之東。首邑名拉  
安。曰塞納疴瓦斯。在塞納之南。首邑名威爾塞列斯。曰塞納馬爾。



內。在塞納之東。首邑名美倫。○法蘭德勒部。在極北境。與比利時  
接壤。改一府曰諾爾。首邑名列黎。○亞爾多亞部。在諾爾之西南。  
改一府曰巴的加雷。首邑名亞拉斯。○比加爾的亞部。在巴的加  
雷府之西南。西界臨海。與英吉利南境相望。改一府曰索美。首邑  
名亞眠。○諾爾滿的亞部。在北境臨海。與英吉利南境相對。改五  
府曰下塞納。北面臨海。首邑名盧昂。曰加爾瓦多斯。北面臨海。首  
邑名加英。曰滿砂。西北兩面臨海。首邑名森的羅。曰疴爾內。在加  
爾瓦多斯之南。首邑名亞靈孫。曰與勒。在下塞納之南。首邑名厄  
危律。以上六府。與英吉利僅隔內海。內海名滿砂遠者百餘里。近者乃  
五六十里。值晴明。兩岸可以相望。有海口曰補羅義。曰加來。又有



大口曰東末。佛人歷年伐英。皆出此港。三口據形勝之地。炮臺周密。防守極嚴。敵船不能近也。○賞巴尼亞部在壹黎亞德佛郎薩之東。改四府曰亞爾德內斯。北界比利時。首邑名美西也。爾曰馬爾內。首邑名砂龍。曰疴卑。首邑名德羅業。曰高馬爾內。首邑名說蒙。○羅勒內部在賞巴尼亞之東。改四府曰米干塞。首邑名巴爾勒都。曰木塞勒。北界日耳曼。首邑名美的。曰木爾德。首邑名囊西。曰窩斯。曰首邑名厄比納爾。○賣內部在諾爾滿的亞部之南。改二府曰馬也內。首邑名拉瓦爾。曰薩爾多。首邑名勒忙。○安如部在賣內部之南。改一府曰賣內羅亞爾。首邑名安惹爾。○北勒達尼亞部在賣內部之西。地形如臂伸入大西洋海。改五府曰壹列。



維勒內。北半距海。首邑名勒內。曰哥的都諾爾。北面距海。首邑名  
森德比勒。與各曰非尼斯德拉。西南距海。有海口。通大河。首邑名  
固英卑爾。曰摩爾比罕。南面距海。首邑名瓦內。曰羅亞爾。南北西  
三面距海。首邑名難得斯。○波亞都部在北勒達尼亞之東南。改  
三府。曰枉德。西面距大西洋海。首邑名不爾奔枉德。曰二塞威勒。  
首邑名虐爾。曰維也內。首邑名波亞壘。○疴尼部在三塞威勒府之  
南。改一府。曰下砂蘭德。南境有海口。內通大河。首邑名羅捨勒。○  
森當日昂姑木亞部在下砂蘭德府之東。改一府。曰砂蘭德。首邑  
名昂姑勒美。○耳里亞內斯部在壹里亞德佛郎薩之西南。改三  
府。曰與勒羅亞爾。首邑名砂爾德勒。曰羅亞勒。首邑名疴爾良。曰



羅亞爾捨耳首邑名波羅瓦。○都勒內部在羅亞爾捨耳府之西。南改一府曰音德勒羅亞爾首邑名都爾。○北利部在耳里亞內斯部之南。改二府曰捨耳首邑名不爾。曰音德勒首邑名砂多。廬以上三部六府在佛腹地。戶口殷繁。閭閻富實。皆佛國股肱郡。○威尼爾內部在捨耳府之東。改一府曰聶維勒首邑名內維爾。○不爾波內部在聶維勒府之南。改一府曰亞列爾首邑名木靈。○馬爾世部在北利部之南。改一府曰哥雷斯首邑名疇勒。○黎木性部在哥雷斯府之西南。改二府曰高維也內首邑名里摩。曰哥勒塞首邑名昉勒。○疇威爾內部在亞列爾府之南。改二府曰不壹德多美首邑名哥勒爾蒙。曰敢達爾首邑名疇里拉。○



亞爾撒斯亞部在不壹德多美府之東改二府曰下勒怒首邑名  
義斯達拉斯不爾厄曰高勒怒首邑名哥爾馬耳○法郎師官德  
部在東界窩斯日府之南改三府曰高索內首邑名威蘇爾曰都  
伯東界瑞士首邑名北三孫曰汝拉東南隅界瑞士首邑名龍勒  
索爾聶耳○不爾疴尼亞部在法郎師官德部之西改四府曰約  
內首邑名疴捨勒曰哥德多爾首邑名的仍曰索內羅亞爾首邑  
名疴敦曰厄英首邑名不爾厄○里疴內部在極東北隅與日耳  
曼接壤改二府曰羅內首邑名里昂曰羅亞爾首邑名蒙比里孫  
○德爾非內部在厄英府之東南與意大利之薩爾的尼亞接壤  
改三府曰義塞勒首邑名哥肋諾伯勒曰多羅美首邑名瓦梭薩



曰高亞爾卑斯首邑名甲。○不羅溫薩部東接薩爾的尼亞南界距地中海改四府曰窩哥律斯首邑名亞威農。曰下亞爾卑斯首邑名的話。曰不世德羅內南境距海首邑名馬耳塞里亞。曰瓦爾東南境距海首邑名達拉給娘。○郎給德部在不羅溫薩部之西幅員甚廣改八府曰高羅亞爾南境距地中海首邑名不壹。曰羅塞勒首邑名漫德。曰亞爾德世首邑名比里瓦。曰加爾首邑名尼美斯。曰厄羅爾德首邑名蒙德。不列爾。曰疴德東境距地中海首邑名加爾加索內。曰達爾尼首邑名亞爾比。曰高加羅內首邑名都羅塞。以上二部扼地中海北岸馬爾塞里亞爲南境第一大埔頭。又有海口曰土崙修造戰艦之地也。○佛亞部在西界下砂蘭德



府之西臨海改一府曰亞列日首邑名佛亞○盧西隆部在南界東距地中海南負比里牛斯山與西班牙接壤改一府曰東比里牛斯首邑名北爾比娘○馬也納部在南界郎給德部之西幅員尤廣改九府曰日倫大西距大西洋海首邑名波耳多海港深通上接內河葡萄酒由此出運爲西境第一大埔頭曰多爾多尼亞首邑名卑里句曰羅加羅內首邑名亞仁曰羅首邑名加爾曰亞維倫首邑名羅德斯曰達爾尼加羅內首邑名蒙德邦曰惹爾首邑名病世曰蘭德西距大西洋海首邑名蒙德馬爾三曰高比里牛斯南界西班牙首邑名達爾卑○伯爾內部在西南隅西距大海南界西班牙改一府曰下比里牛斯首邑名波○哥爾塞牙部



一作可耳西加又作噶爾西阿又作郭士喀

在國東南乃地中海大島在薩爾的尼亞

島之北舊本屬意大里佛人取之今改一府廢王拿破侖卽此島

人。圖附意大里亞

佛郎西頗重讀書學優者超擢爲美官其制宰相一人別立五爵公所又於紳士中擇四百五十九人立公局國有大政如刑賞征伐之類則令公所籌議事關稅餉則令公局籌辦和無權宣傳王命而已國有額兵三十萬戰船大小二百九十隻水兵五萬船之大者載砲七十二門至一百二十門亦有火輪船數十隻巡駛地中海其俗人人喜武功軍興則意氣激揚面有矜色臨陣跳盪直前議不返顧前隊橫屍雜遝後隊仍繼進不已獲勝則舉國歡呼



雖傷亡千萬人不恤但以崇國威全國體爲幸其酋長沈鷺好謀知兵者多水戰陸戰之法無不講求又好用縱橫之術故與諸國交兵常十出而九勝

按佛郎西在歐羅巴諸國中傳世最久自哥羅味開基至今已千餘年中間雖迭遭變故而代立者皆其宗黨未滋他族未立女主較他國之奕棋置君者固有間矣立法駿厲賢君復六七作危而不亡殆有由也

歐羅巴用武之國以佛郎西爲最爭先處強不居人下偶有凌侮必思報復其民俗慷慨喜戰有小戎鐵駟之風其用兵也仗義執言不似諸國之專於牟利故千餘年中侮亂迭生而虎視



泰西國勢未嘗替削。至拿破侖之百戰百勝。終爲降虜。則所謂兵不戢而自焚。又可爲瀆武者之殷鑒矣。

佛郎西屬地在別土者。亦有數處。如南印度之本地治利。南亞墨利加之歪阿那。亞非利加之阿爾及耳。印度海之不爾奔得之。不甚經營棄之。亦不甚惜。蓋不以此爲重也。

歐羅巴各國。皆以販海爲業。如英吉利。米利堅。呂宋之屬。每歲商船至中國。多者百餘艘。少亦三四十艘。所販鬻者。多棉花。洋布。粗重之物。至如洋米。胡椒。蘇木。海參之類。皆從東南洋轉販。並非西產。獨佛郎西商船最少。多則三四艘。少則一二艘。入口之貨。皆羽毛。大呢。鐘表。諸珍貴之物。蓋其國物產豐盈。製作精。



巧○葡○萄○酒○大○呢○綢○緞○之○類○售○之○歐○羅○巴○各○國○卽○已○利○市○十○倍○不○  
必○遠○涉○數○萬○里○而○謀○生○其○航○海○而○東○來○也○意○在○於○耀○聲○名○不○專○  
於○權○子○母○國○勢○旣○殊○用○意○迥○別○其○情○勢○可○揣○而○知○也○

顧亭林天下郡國利病書云佛朗機

卽佛郎西

古無可考素不通中

國○正○德○十○二○年○駕○大○舶○突○至○廣○州○灣○口○銃○聲○如○雷○以○進○貢○請○封○  
爲○名○撫○按○查○無○會○典○舊○例○不○允○遂○退○泊○東○莞○南○頭○徑○自○蓋○房○樹○  
柵○恃○火○銃○以○自○固○有○至○部○者○不○行○跪○禮○朝○見○欲○位○先○諸○夷○御○史○  
邱○道○隆○何○鼇○皆○言○其○殘○逆○稱○雄○先○年○潛○遣○火○者○亞○三○假○充○滿○刺○  
加○國○使○臣○風○飄○到○澳○往○來○窺○伺○熟○我○道○途○畧○買○小○兒○烹○而○食○之○  
近○日○滿○刺○加○國○王○奏○其○奪○國○讐○殺○等○情○宜○卽○驅○逐○嚴○禁○私○通○將○



所造房屋城寨盡行拆毀。詔皆從之。誅其首惡火者亞三。海道汪鉉以兵逐其餘黨。反用銃擊敗我兵。或獻計使善泅者入水。鑿沈其舟。盡擒之餘。乃遁去。汪鉉由此得佛朗機銃式。請頒於邊鎮。至今三邊實賴其用。嘉靖中。黨類更番往來。私舶雜諸夷中。首領人皆高鼻白哲。廣人能辨識之。又云佛朗機人好食小兒。其國惟國王得食之。臣僚以下皆不能得。至是潛市十餘歲。小兒食之。每一兒市金錢百文。廣之惡少競掠小兒往賣。居二三年。兒被掠益衆。遠近患之。云云按佛郎西之至粵。在正德年間。是爲大西洋抵粵東之始。明人不知有大西洋。以爲其國在瓜哇之南。誤矣。當時重臣以會典所無。絕其封貢。言官復請驅



逐童牛之牯所慮未嘗不遠而鑿舟之役事殊杳茫嘉靖以後更番來粵又何嘗能禁絕之也至烹食小兒非人類所爲卽有獻媚之易牙未必遂沿爲故事佛國之在西土稱雄已千餘年果有此事諸國當視爲豺虎誰甘以牛耳相讓又我

朝通市二百年佛人每歲來粵何以不聞有此似當時之傳聞亦

未必盡確也

或云佛郎西人好買小兒教織起花紬緞此則近似泰西諸國惟佛人能織花緞也

鳥鎗之

制由此傳入中土實爲水陸利器靖潢池之反側肅羣庭之鳴吠星馳電掃利賴何窮而不知此技之由來乃卽從中國之火礮變化而出論者乃謂火器創於泰西蓋亦不考之甚矣

已詳歐羅

巴圖說泰西人書言之鑿鑿足知其不誣也



鑿舟之說。自來以爲奇策。謂募善水之人。伏於船底。用利斧鑿孔。其船立沈。又聞善水之人。能伏水底。晝夜能於水中食餅餌。兼操作。嘗以詢之竇升堂提軍。彪提軍云。此技余少時嘗學之。未成也。而知其梗概。凡人入海水。必閉目。否則爲鹹水所侵。目且盲。必閉氣。否則流隨吸入。轉瞬而腹彭亨。年少力壯者。閉氣稍久。亦斷無逾刻許者。其能不浮。不沈。恃手足之運動。運動少停。則隨波湧出。水面斷無在水中。尙能施力。運斧之理。且海水波浪最勁。愈深愈勁。能浮江河之水者。入海水則敗。能浮內港之水者。入大洋則敗。善水之人。在大洋落水。得片板可不死。若徒手浮沈大浪中。力盡氣微。亦未有不死者。此技即使至精。



斷不能化其身爲魚鱉。世俗所傳大半得之耳。食資談柄則奇。  
創可喜。竟欲施之實事。則愚矣。又守備吳金魁。水師勇士殺海賊無算爲賊傷  
斃得亦嘗習此技。余問之亦云然。閱天下郡國利病書所記。  
旨優卹佛朗機事有鑿舟之說。因附記於此。





西班牙葡

萄牙合圖





大西洋海

大西洋海







西班牙國

西班牙。是班牙。○實班牙。○斯葡亞。○士便。○干絲。亦。歐羅巴。大。

臘。○義斯巴尼亞。○以西把尼亞。○大呂宋。

國東北與佛郎西接壤。東南距地中海。西界葡萄牙。北距大西洋。海西南至東北約二千四百五十里。東南至西北約二千八十里。國有大山數疊。皆自東而西橫亘如垣。劃分三土。北土山嶺錯雜。溪澗交流。中多腴壤。便於農作。中土高廣。天時炎燥。雨水難得。民多以牧羊爲業。南土山川秀發。風景清美。產各項果實。羊馬驢騾皆良。勝於他國之產。其地古名意卑里亞。五方之人雜處。非尼西亞人居多。古商賈之國。後爲加爾達額人所據。亦非尼西亞人所立。國在地中海南岸。漢初意大里大將奔彪帥師征服之。遂爲羅馬西境。越六百餘年。羅



馬衰西境爲汪德羅隋窩亞拉奴

皆北狄種類

三部之人所據東晉安

帝十三年。義特

一作哥度又作維西哥多又作厄都亦北狄別種

酋長雷維郎的約率大

隊自東方來攻羅馬守臣不能禦棄地而逃東地遂爲義特族所

據尋翦滅西境諸部以隋文帝開皇季年立國傳一百餘年至羅

德黎哥性苛暴其臣有人良者爲維德黎哥所摧辱時亞刺伯回

部據亞非利加北境

即摩樂哥阿利額諸回部

兵力方強唐睿宗大極元年人

良引回部入寇西班牙望風奔潰王奔北鄙國爲回部所奪僅餘

亞斯都里亞斯比斯加亞納瓦拉三部降爲侯國歷七百餘年亞

刺伯衰弱守土回酋各裂土自擅日尋干戈亞斯都里亞斯侯伯

拉納誓衆興師攻回部大捷衆推立爲王尋攻獲加斯德辣地稱

加斯德辣王令我特人自戰其地得卽封之回部或降或竄故土  
全復而國已數分然姬姬相聯無釁爭加斯德辣傳至女主依撒  
伯爾贅亞拉岡侯非爵難多明成化十五年諸部仍合爲一是爲  
西班牙復建之始依撒伯爾聰敏過人能修國政疑大海之西有  
廣土宏治初年遣其臣可崙一作閣龍又作哥隆波駕巨艦裹糧探之果得

亞墨利加之可倫比亞驅逐土番徙國人實其地漸拓而南北墨

西哥祕魯智利拉巴拉他等部

詳亞墨利加圖說

皆聽役屬諸部產銀鑛

極王每歲得數百萬觔西班牙以此致富西土稱爲金穴嘉靖年  
間復遣其臣米牙蘭航海東來至亞細亞東南洋之呂宋據其海  
口建設埔頭帆檣湊集百貨流通由此愈益富饒先是正德十四



年日耳曼內亂時西班牙王查理第五有賢聲日耳曼各部迎以

爲王。西班牙立其世子非立第二。

泰西人所編綱鑑敘述如此近閱大西洋人所著地理備考則

云粵地利公爵非里卑

第二非立

娶先王之女若亞納遂即君位二

說不同未知孰是然綱鑑專紀各國興亡世系頗爲詳核必有依

據故仍

兩國聯爲唇齒。傳子加爾羅斯。國益富強。西隣葡萄牙本

從彼說

西班牙西部。趙宋時驅逐回部。別立爲國。萬厯中。葡萄牙王禦敵

殞。無子。西班牙遂收復其地。越六十載。復分裂。

詳葡萄牙圖說

方。西班牙

之恢復舊土也。回民之未逃者。皆降附。爲編氓。歲久復繁衍。逾數

十萬戶。西班牙以其族類殊異。終爲後患。勒兵驅逐之。回民皆破。

家。攜孥狼狽渡海。轉徙入亞非利加北境。

即阿利額等回部

失業者。因剽

掠餬口。地中海從此多盜。而西班牙戶口驟減。貿易漸微。日益貧。

寡論者頗譏其失計。康熙三十九年，西班牙王查理歿，無子。舉地

利王

卽日耳曼王時日耳曼列國俱已稱王故舉地利不復稱日耳曼王

欲立其子佛郎西王。欲立

其孫。構兵累年。卒立佛王之孫非立第五爲西班牙王。王英果能

立政休養生息。西國再康。乾隆末年佛郎西內亂。西班牙始攻佛

後與佛約結攻英吉利。戰船遭風大半沈失。已而佛郎西拿破侖

卽位時。西班牙王加爾羅斯與其世子不睦。嘉慶十二年拿破侖

約其父子爲好會於馬也納。云爲調協。至則數其罪而兩囚之。自

立其弟爲西班牙王。西民不服。招英吉利兵合攻之。交戰五年。逐

拿破侖之弟。復立故王世子非爾難多。自是以後內訌四起。日就

衰亂。王歿無子。立幼女依撒伯爾。母后擅權。王弟煽回部遺民爲



亂蓋岌岌乎危亡之勢焉。亞墨利加諸藩國皆畔。僅存古巴片土。

詳亞墨利加海灣羣島圖說

與呂宋埔頭而已。

西班牙北境負比里牛斯大山。地氣頗寒。南境臨地中海。夏令酷熱。賴海風滌暑氣。中土距海面一百四十四丈。爲歐羅巴極高之地。四時多風。隆冬不煬火。河道之大者十二。尤著者曰米虐。曰斗羅。曰德人。曰瓜達爾幾維爾。皆入大西洋海。曰厄波羅。入地中海。土多膏腴。五穀之種皆備。木多橡。果多葡萄。山產各礦。金銀近已空竭。銅錫鉛尙有之。惟鐵與煤採之不竭。又產鑽石寶石五色玉。瑪瑙水晶。其民俗膽氣粗豪。專務報復。好逸憚勞。惰於農作。早餐後必午寢。以此鄉戶多貧瘠。半居棚寮。俗儉嗇。杯酒一果之外無。

他求男女並好彈琴跳舞爲樂。又好爲鬪牛之戲。聚觀者如堵牆。或縱狂牛於場。勇者挾刃搏而刺之。獲勝則千萬人歡呼迎賀。舉國奉天主教。教師有大權。違異者以火焚之。貿易之繁盛在海濱各埔頭。稅餉歲入一千八百萬兩。養兵太多。軍興用不足。恆貸於富民。償其息。近年主計者多失信不償。富民悶不肯借。每敵兵壓境。輒因缺餉撓敗。國舊分十三部。近年改爲四十九部。合二島分上中下三等。○新加斯德辣在中土。爲四境適中之地。縱約六百里。橫約七百五十里。地高燥多沙磧。草木不繁。現改五部。曰馬德里地。一作莫珠爾勒列上等都城。同部名。建於滿薩那勒斯河左。

王廷極宏麗。土木之費計千萬金。內有學署醫院。觀星臺。軍功廠。



古玩庫藥草圃療育館。居民約二十萬人。產呢羽綢緞地氈印花洋布磁器。曰瓜達拉砂辣。列下等。古時多名人。所產呢羽綢緞頗著名。曰多勒多。列中等。昔回部據西班牙。以此爲都城。宮殿猶有存者。夏日苦熱。乏水泉。土人多飲坎中積雨。曰固盈加。列下等。產蜜蠟牲畜。曰盧達里亞耳。列下等。產水銀。○舊加斯德辣。在新加斯德辣之北。縱約四百六十里。橫約七百七十里。山岡與平原相間。現分六部。曰不爾厄斯。列下等。田土肥沃。氣候和平。產五穀百果。曰羅哥羅虐。列下等。地頗清勝。產穀果。商賈輻輳。曰三當德爾。列下等。會城建於比斯加亞海口。估帆雲集。爲北境大埔頭。地產穀果黃麻牲畜。煤窰極多。曰索里亞。列下等。城建山谷中。產羊毛。

曰塞額維亞列下等地。氣寒。產呢羽。玻璃紙。割曰亞維拉列下等。地有書院。產洋布。良在舊加斯德辣之西。縱約七百里。橫約四百五十里。地氣平善。物產豐饒。現改五部曰良列下等。會城屋宇高大。郊外風景清幽。產白玉曰巴稜西亞列下等。產穀果甚豐。曰瓦里亞多黎列中等。土田最腴。產穀果數倍他部。又產材木極堅。船料仰給於此。兼產呢羽。綿紗磁器。曰薩拉蒙加列下等。昔爲西國大都會。代有聞人。兵火之後。凋敝已甚。曰薩摩拉列下等。產葡萄黃麻羊毛。○加黎薩在良西北。南界葡萄牙。西北距大西洋海。居米虐河下游。縱約五百里。橫約四百五十里。近海卑濕。草場豐茂。宜牧畜。現分四部曰哥魯尼亞列上等。城建海隅。泊船最穩。商



賈輻輳爲西北境大埔頭。港口有大礮臺極堅固。曰顱額。列下等。地有羅馬舊城。產麻布。曰疍稜塞。列下等。產火腿葡萄酒。曰奔德威達拉。列下等。產剪絨銅器。○加拉拿大在極南境。臨地中海。縱約二百餘里。橫約八百餘里。地近赤道。天時炎熱。而水土平良。現分三部。曰加拉拿大。列上等。會城舊爲回部王都。戶口八萬。物產甚豐。稱南方大都會。曰亞爾美里亞。列下等。有海口極深闊。可泊舟。山產玉石瑪瑙。曰馬拉牙。列上等。城建海濱。泊船最穩。貿易極盛。爲南境大埔頭。○瓦稜薩在東南隅。臨地中海。縱約七百里。橫約二百里。地氣極暖。罕見冰凌。現分三部。曰瓦稜薩。列上等。會城建於平原。居民六萬萬。厦整潔。貿易極盛。產穀果油酒綢緞大呢。

曰亞利干的列中等城。建海濱。街衢闊直。港道寬穩。爲東南境大

埔頭出口之貨。窩宅

亦鉛類

黑鉛。白礬。銀硃。藍靛。百果。葡萄酒。葡萄

乾。曰加斯德。倫得拉。不辣納。列下等城。建海濱。物產貿易。與亞利

干的畧同。而富盛遠遜之。○木爾西亞在瓦稜薩之西南。東南境

臨地中海。縱約二百餘里。橫約三百餘里。現分二部。曰木爾西亞。

列中等城。建山谷中。戶口三十六萬。地氣溫厚。物產憤盈。穀果麻

酒皆豐。又產銅錫硫磺。白礬。有鹽池。產鹽極王。曰亞爾巴塞爾。列

下等。產布疋。牲畜鐵器。○亞拉岡在舊加斯辣之東。縱約七百二

十里。橫約四百八十里。山嶺重疊。寒燠懸殊。產麥麻。百果。酒。油。蜜。

蠟。牲畜。兼產銅鐵錫礬。不灰木。現分三部。曰薩拉厄。撒列下等。舊



本繁盛。遭兵燹而殘毀。曰烏厄斯加。列下等。土膏腴。少歉歲。曰德魯厄爾。列下等地。氣甚寒。人乏疾病。產烏煤。○納瓦拉。在亞拉岡之西北。與佛郎西接壤。縱約三百里。橫約二百餘里。產黍稷大麥。油麥豆栗。山產木料及五金之礦。現仍爲一部。列下等。○亞斯都里亞斯。在舊加斯德辣良兩部之北。北境距大西洋海。縱約一百五十里。橫約四百六十里。南境負大山。民居巖谷。農作甚勤。產栗子。佛手山。產銅鐵錫鉛白礬水晶。又產駿馬。現仍爲一部。曰疴維夜多列。中等。○加達魯尼亞。在亞拉岡之東。東南臨地中海。北負比里牛斯大山。與佛郎西接壤。縱約五百里。橫約七百里。依山傍海。物產憤盈。地氣平善。戶口最繁。織造呢羽皆精良。貿易之盛。甲

於通國。山產材木五金水晶白玉藍寶石白黑礬礪砂。現分四部。  
曰巴爾塞羅內。列上等。城建海濱。居民十二萬。葡萄酒燒酒橄欖  
油南果由此出運。爲東境第一大埔頭。曰達拉瓦納。列下等地。多  
烈風。穀果豐碩。曰勒黎達。列下等物產亦豐。曰日羅納。列下等城。  
建山麓。有金湯之勢。國變時屢被兵。日形凋敝。○比斯加亞介納  
瓦拉亞斯都里亞斯之間。北距大西洋海。縱橫皆二百餘里。產木  
材甚富。船廠皆取給焉。現分三部。曰比斯加亞。列下等。會城頗繁  
盛。爲羊毛總聚之地。曰給不斯孤。列下等。城建山麓。爲北境鎖鑰。  
嘉慶十八年。佛郎西來侵。屋宇礮臺俱成灰燼。事定之後。脩復如  
初。曰亞拉襪。列下等。○義斯德勒馬都拉。在新加斯德辣之西西。



境與葡萄牙接壤。縱約六百六十里。橫約四百六十里。土肥沃而氣候極炎。現分二部。曰巴達熱斯。列下等。城建瓜的牙納河右極堅固。有石橋。長一千八百步。闊二百步。橋孔二十有八。產穀果菽酒牲畜。曰達塞勒斯。列下等。產牛羊。○安達盧西亞。在新加斯德辣之西南。西界葡萄牙。西南臨海。縱約五百里。橫約一千一百五十里。山阜與平原相間。其山有毛有童。產穀果絲綿蜜酒油鹽甘蔗牲畜。又產銅鐵窩宅水銀礪砂。長夏酷熱。土人多夜作晝輟。現分五部。曰塞維里亞。列上等。城建平原。居民九萬。豐饒。爲南土之最。曰烏厄爾襪。列下等。民多以網魚爲業。曰加的斯。列上等。城建海角。大而堅。著名西土。居民五萬三千。貿易昔稱極盛。今漸蕭索。

曰哥爾多瓦。列中等。城建達爾幾維爾河之右。傑構雲連。樓臺重疊。街衢狹而穢。居民五萬七千。曰熱音烈下等。土甚沃而農作不勤。○巴里亞利斯在西班牙東南地中海內。合五島爲一部。列下等。曰馬惹爾架。曰米諾爾架。兩島較大。戶口約二十萬。產南果極多。曰壹維薩。曰佛爾門德辣。曰加卑勒拉。○加拿列斯在阿非利加之西。大西洋海中。合大小二十島爲一部。以德內黎非島爲首。列下等。○安達盧西亞之南境與阿非利加之北境相對。成海峽。曰日巴拉爾大。一作直布羅陀長約八十里。闊約五十里。狹處止十餘里。爲地中海之門戶。英吉利於北岸磐石之上築堅城。曰義人答答。環以礮臺。守以重兵。已歷百餘年。佛郎西西班牙屢攻之。不能取。



也

按西班牙境土恢闊。埒於佛郎西。其俗長於泛海。善於行遠。自得亞墨利加。墨西哥諸部之後。其國有金銀氣。西土視爲陶猗。至今歐羅巴各國行用之洋銀。大半稱呂宋番。宜其富強莫與京矣。然近年衰弱已甚。且貧苦者何也。富而無政。雖秦隋不免覆亡。况區區之夷國乎。

呂宋在中國東南洋。與歐羅巴相去絕遠。西班牙於前明中葉探得之。立爲埔頭。由是其商船來粵東者。率稱大小呂宋。或稱宋仔。而西班牙之名轉隱。

葡萄牙國

葡萄牙

葡萄牙駕○葡萄牙庫耳○布路亞○波耳都欺○博爾都噶亞○大西洋

歐羅巴小國也地形

狹長縱約一千三百里橫約五百里東北兩面界西班牙西南兩

面距大西洋海其地古名盧西達尼亞本西班牙西境自唐以前

沿革與西班牙同當西班牙恢復舊土有臣曰英黎給佛郎西之

王孫也善將兵戰功最多加斯德辣王

即西班牙王時故土尚未全復亦未歸一故不稱西

班牙

亞豐蘇妻以女以所克盧西達尼亞數城封之爵如伯其子

亞豐蘇英黎給襲位伐回部大破之擴地漸廣宋哲宗紹聖元年

國人奉以為王是為葡萄牙立國之祖其後嗣征服回部盡有盧

西達尼亞之地遂與西班牙並立明嘉靖間有賢王曰以馬努以



利能立制防國稱極治子約翰第三嗣位聯昏於西班牙四境又安倉庫充實子英黎吉嗣位亞非利加回部來侵出戰敗沒無子西班牙乘勢并其國由是隸西班牙者六十年西政貪殘葡人患倒懸崇禎十三年起兵逐西班牙守者復立故王支屬約翰第四西班牙屢來侵構兵二十餘年葡王脩好於英吉利英吉利助以兵力時擁護之乃免於亡先是歐羅巴諸國自開闢至元時自相往來鮮通別土葡萄牙人精於算數習天文用儀器測量日出入并星躔度數知水陸之方向遠近明初其國王遣善操舟者駕巨艦南行由亞非利加之西境轉而東歷亞非利加之東境抵五印度之西境復轉而東至麻喇甲又從蘇門答臘噶羅巴之海峽遍

歷東南洋諸島國所至輒留葡人營立埔頭隆慶初抵粵東香山

縣之濠鏡門即澳請隙地建屋歲納租銀五百兩置臣林富代請許

之葡萄牙人遂立埔頭於澳門是為歐羅巴諸國通市粵東之始

其後西班牙荷蘭接踵東來佛郎西英吉利繼之葡萄牙所立小

西洋東南洋埔頭咸被侵奪僅餘澳門一廛為諸國東道之逆旅

嘉慶初佛郎西拿破侖侵伐四隣兵及於葡葡不能禦王棄國航

海逃於巴西一作巴巴西者南亞墨利加廣土葡人於明中葉探

得之建為藩部者也詳亞墨利加圖記已而拿破侖為英吉利所禽王乃

歸國尋卒其世子留王巴西兼王葡巴西民謂王貪王兩地不肯

服王不得已自王巴西而遣幼女歸王葡時王弟已自立不肯避

葡農志畧  
卷之  
葡萄牙國



位。王在巴西。不習其俗。國人迫王致位。王狼狽歸國。與女合兵。攻弟英吉利。助以兵。滅王弟。王女乃定位。尋贅日耳曼世子爲婿。夫卒再贅。女慈惠愛民。國人安之。

葡萄牙壤地褊小。外臨大西洋海。境內萬山盤匝。平原甚少。大河三曰米虐。曰斗羅。曰德人。皆發源西班牙。由葡西境入海。西北氣候頗寒。東南則夏苦炎熱。穀以小麥。苽黍爲主。大麥油麥高粱粟米。杭稻蠶豆豌豆。亦皆有之。土田最沃。而農功疎惰。木多松柏栗橡槐楊楓。槲果有黎橘桃梅櫻桃核桃杏仁波羅佛手檸檬。無花果阿利襪。卽橄欖其仁可以爲油最多者爲葡萄。用以釀酒極甘。色赤味甜。內有雜櫻桃者販行遍於西土。亦解種桑。養蠶。產絲無多。山產紅藍寶石水晶。

五金各鑛黑礬硫磺磁石。鹽田則沿海皆是。取之不竭。舉國崇天

主教。財貨半歸教師。民恆貧乏。國舊分六部。後分爲八部。各有所

領小部。○義斯德勒馬都拉在南北適中之地。西距大西洋海。縱

約六百里。橫約二百五十里。領十一小部。曰里斯坡亞。一作力士門。又作勒

門葡萄牙之都城也。建於德人河右。跨山臨水。樓臺疊起。內有學

署。書庫觀星臺。軍功廠。規模極爲鉅麗。郊外內港寬深。下接海口。

泊舟平穩。貿易極繁。河岸礮臺周匝。守衛嚴密。乾隆二十年。遭地

震。王廷民舍不遺一椽。死傷山積。歷年修建。乃復其故。曰德黎威

德辣。產葡萄。有行宮甚麗。曰加斯德內辣。其海口可泊舟。曰亞零

給爾。有溫泉能療病。曰勒黎亞。物產甚豐。有玻璃廠。足供通國之



用曰亞爾哥巴薩。產棉布。曰多麻爾。產油酒穀果甚多。貿易頗盛。曰歐靈。曰商的。勾西兩部。地處高陵。土田甚瘠。曰三達零。在德人河右。土腴產豐。繁華爲通國之最。有行宮。備冬獵。曰塞獨巴爾。在薩都河右。巨舟可泊。產鹽極王。○卑辣在義斯德勒馬都辣之北。東界西班牙。西臨大西洋海。縱約六百里。橫約三百里。近分二部。曰卑拉亞爾達。曰卑拉拜砂。共領十一小部。曰固英巴拉。舊爲卑拉會城。有大書院。葡國名人皆由此出。土產磁器麻布。曰亞爾加尼耳。地幽闇。烟戶甚稀。曰亞威羅。在窩烏牙河口。埠頭甚大。而水土頗劣。產魚鹽磁器紅橘。曰非辣。田甚沃。其河多魚。曰維修。卑拉亞爾達之會城也。有大市。產棉布。善造金銀器皿。曰拉美厄。產烟。

葉多畜豚。曰比聶爾。與西班牙接壤。城極堅。曰達耶哥索。城有七門十五塢。砲臺周密。曰瓜爾達。地氣嚴寒。產棉布洋絨鮮果。曰黎尼亞利斯。地荒僻。少戶口。曰加斯德羅巴耶古。卑拉拜砂之會城也。城垣整峻。街衢敞潔。物產亦裕。○亞零德人在義斯德勒馬都拉之東。卑辣之南。東界西班牙。西南隅臨大西洋海。縱約五百里。橫約二百九十里。富庶甲於諸部。產穀果羊毛。餅油酒蜜蠟。領小部八會。城曰厄窩拉。城市華整。產磁器陶器。曰卑惹土。腴氣清。民物康阜。城外有塢四十。又有方礮臺甚高。可遠眺數百里。曰窩黎給。昔亞豐蘇英黎給大破回部於此。其後人建坊廟以志武功。曰維拉威索薩。城有大宅極巨麗。高爵居之。又有大園周迴四十



里內多嘉樹清泉。麇鬼充牣。曰呢里襪斯。爲葡第一堅城。戶口繁密。商賈輻輳。曰玻爾達勒給。劣物產豐富。人多素封。曰加拉多。戶口寥落。曰亞維斯。有行宮。○亞利牙爾威。西南臨海。北界亞零德人。東界西班牙。縱約一百里。橫約三百四十里。其民雄健。好武。多以捕魚爲業。尤善駛船。舊本小國。葡滅回部。并兼其地。領小部三會城。曰發羅。平原饒沃。烟戶湊密。人多習漁。曰達維拉。葡萄遍野。網罟蔽河。山產銀銅。曰拉各斯。城建海隅。港口深闊。可泊大船。屬邑薩給勒斯。有書院。故王亞豐蘇英黎給所建也。○斗羅米虐。東北界西班牙。南界卑拉。西臨大西洋海。縱約二百五十里。橫約一百五十里。其地樹木成林。牲畜蕃衍。近分二部。曰斗羅。曰米虐。共

領小部七曰巴拉加米虐之會城也。人烟湊密。多峻宇。產軍器鐵

器。麻布金銀器皿。價甚廉。曰伯爾多斗羅之會城也。物產之豐。實

易之盛。亞於里斯玻亞。葡之京都曰北那非野爾。人戶甚稀。曰幾馬拉

英斯。昔開國之王亞豐蘇英黎給誕生於此。宮殿遺址猶存。產鐵

器。牛皮。曰維牙納。城建黎罵河口。泊舟甚穩。土產極豐。曰巴爾塞

羅斯。地亦豐富。產火腿。曰瓦連薩。城極堅固。○達拉斯德斯蒙德

世。東北界西班牙。西界斗羅米虐。縱約二百二十里。橫約三百三

十里。巖谷迴環。牲畜繁富。葡萄桑樹。市野彌山。領小部四。會城曰

巴拉安薩。建於山陵之上。戶口不繁。土雖沃。而水泉鹹劣。產綢緞

絲貨。曰迷蘭達。昔之名城。久已墮毀。人戶尤稀。曰蒙哥爾窩。有織



造絲貨機房貿易極盛。產葡萄酒美酒。曰威拉里亞爾地。極豐富。戶口最繁。屬巴北蘇的勒瓜。釀葡萄酒最良。商販絡驛。每歲得酒價約五六百萬金。○葡萄牙之西大西洋海中。有羣島。距葡境約二千餘里。葡探得之。墾爲外部。總名曰亞索利亞。譯言鷹島也。島之大者有九。南方二曰三達馬利亞。曰三迷給爾。中央五曰德爾塞辣。曰三惹爾。曰加拉西約薩。曰發牙爾。曰北哥。北方二曰佛羅里斯。曰哥爾窩。各島天氣晴和。水土平善。產五穀南果極多。中稔之年。猶堪出售五十舟。近刻有地里備考。大西洋人馬吉士所譯。於西班牙葡萄牙兩國紀載。獨詳葡萄牙。

其本國西班牙其祖國也。茲節採之以例其餘。

按粵東之居夷自葡萄牙之居澳門始。維時尙方珍玩。皆取辦

於粵或不時給輒爲中涓所黷適葡人有濠鏡之請當事利其  
居積貨實便於供辦又所謂歐羅巴者爾時不知爲何地以爲  
不過南洋諸夷之類一枝暫借無足重輕非必貪其五百金之  
利也葡萄牙本西洋小國得此奧宅如登天上以其餘資廣築  
樓館綿亘萬厦歐羅巴諸國來粵者倚爲東道主人其畱粵收  
逋欠者皆租其房屋久居不去諸夷之浸淫狎熟於粵東則由  
澳門爲之權輿也林富一代名臣而謀國之疎若此語云涓涓  
不絕將成江河可不慎哉

葡萄牙初至澳門其本國商船來者甚多極爲饒裕迨後印度  
南洋各埔頭多爲諸大國所侵奪本國估帆遂致絕迹生計日



益貧窘。僅以屋租爲養命之源。其居澳門者。長子孫已數百年。粵人謂之土生仔。生齒既繁。憂貧特甚。


澳門之夷。俗呼爲大西洋。又稱爲意大里亞。當其初來。中土不詳其部落之名。彼謂從大西洋來。則稱爲大西洋。而不知葡萄。牙之在大西洋。不過滕薛之類也。至稱意大里亞。則以意大里。爲彼土一統之朝。猶之稱中國爲漢人。唐人耳。又利瑪竇南懷仁之屬。以厯學名。中土皆意大里之羅馬人。而其來也。皆居澳門。訛誤相仍。有自來矣。

英吉利三島總圖



大西洋海


大西洋海



大西洋海

英 英  
倫 士  
圖 利





英吉利蘇格蘭圖

格

蘭圖



大西洋海




英吉利阿

爾蘭圖



大西洋海



大西洋海

英吉利國

英吉利。英機黎。○英圭黎。○膺吃黎。○諸厄利。○英倫的。○及列的不列顛。歐羅巴強大之國也。地

水三島。孤懸大西洋海中。迤東兩島相連。南曰英倫。一作英蘭。北曰蘇

格蘭。一作斯哥西亞。又作師古泰。兩島南北約二千餘里。東西闊處五六百里。

狹處三四百里。迄西別一島曰阿爾蘭。一作耳蘭。又作壹爾蘭。大南北約七八

百里。東西約五六百里。英倫南境與荷蘭佛郎西皆相近。舟行半

日可達。距佛尤近。海港狹處止六七十里。兩岸可以相望也。其地

古時為塞爾達士番部落。後為北狄義特族所據。漢宣帝五鳳三

年。羅馬大將愷撒。一作人畧。塞薩爾。畧定西北諸番。渡海平英倫。建為別

部。屬意大里者數百年。至今猶有羅馬城闕遺址。前五代時羅馬



衰亂。我特族卑勒敦人據英倫。後爲據蘇格蘭之斯各多比德斯。兩部所攻。孤弱不能自立。求援於安各羅。安各羅者亦我特種寄居撒遜比利時界內。兵素強。而偏仄無立國地。既爲卑勒敦人所邀。則大喜。悉衆渡海。破走蘇格蘭兩部。因脅降卑勒敦人。陳後主元年。據英倫立國。後分爲七部。如列國。小侯時相攻伐。有厄伯德者。娶佛郎西王之女。女奉天主教。招教師來其國。爲制禮儀。由是其國漸強。唐德宗貞元十六年。滅六部。歸於一。是時大尼國卽噠國方劫掠海上。突以兵船入英倫。據都城。英人以厚賂緩兵。尋以計焚其船。自是大尼寇抄不已。居民逃竄。田野荒蕪。王子有亞腓烈者。智畧過人。幼時嘗兩赴羅馬。與文士遊。方嗣王位。而大尼以大

衆來攻王。乃僞爲樂工抱琴造敵營。請奏伎侑酒。因得縱觀虛實。進兵決戰。破其連營。是時佛郎西已陷北地。大尼迭侵擾王枕戈寢甲五十餘戰。而外患平。乃墾田勸農。招徠商旅。開學堂以譯異書。立保約以弭盜賊。境內大治。王卒於唐昭宗年間。嗣王孱弱。大業遂衰。先是英倫以尙天主興久之。教師擅大權。王娶后。教師禁不令同室。王不聽。教師刦后以鐵烙毀其容。尋斃之。王噤不能仇。由是王僅守府國。勢不振。大尼復來侵擾。許以歲賂。始給銀一萬七千觔。後增至二萬四千觔。而兵不止。宋眞宗十九年。大尼大舉來伐。破倫敦都城。遂兼英。其王曰駕奴特。立治粗有條理。英人安之。其子嗣位。苛斂好兵。先是英北族英倫北部有酋曰威廉。一作給列爾美常



仕佛郎西。守西北大郡。大尼旣滅英。威廉欲圖興復。請於羅馬教王。教王以英土封之。宋英宗治平年間。威廉率舟師伐英。大尼王禦之。兵敗被殺。威廉進攻。據倫敦。遂王英。北族凌英民。英民多反。側王怒。驅英民十萬衆於林中。皆凍餓僵死。以其田宅賜北族。旣而悔恨卒。王顯理第一。嗣宋高宗二十七年。王顯理第二立。有智謀。時天主教魁參預國事。王有所拔擢。教魁輒阻撓之。羣臣怒。殺教魁。王懼。教王之加罪也。自守齋拜其墓乃已。附近有伊琳大洲。卽阿爾蘭。王征服之。其世子剛猛好戰。欲伐居猶太之回回族。先往聘修好。歸途爲他國所擄。以金贖回。後戰死。其弟約翰嗣位。性強狡。好田獵。百姓疾之。又侮天主教師羅馬教王。怒棄絕英民。息禮拜。

閉殿堂廢其婚葬禁飲酒食肉薙鬚民皆怨恫咎王王不得已納貢教王由是權遂下移民自擇薦紳議政不復關白王憤甚欲誅

諸紳諸紳欲招佛郎西世子爲王會王歿華義都第三一作義都亞爾多

嗣立有權畧平內難與佛郎西構兵累年互有勝負其子嗣位權

復爲紳民所侵英有別部之酋忽起兵攻王奪其位明建文帝元

年國人立顯理第四募兵恢復滅僭位者國乃定顯理第五立伐

佛郎西勝之顯理第六立年尙幼大臣攝政時王宗分二派一曰

紅玫瑰派一曰白玫瑰派因初分之第宅植此兩種花因以得名兩宗爭欲據王位

自相屠攻國大亂者數十年藩屬皆叛明憲宗成化年間顯理第

七嗣位削平內亂四境乂安王性機敏長於吏治稱爲賢主顯理



第八立性強傲尙豪華喜怒不常娶西班牙王女爲后因助西班牙伐佛郎西后無子出之再娶少艾已而失寵殺之再娶又殺之王有佞臣委以大權偶迂意立賜死忠言至計如充耳四國皆稱爲無道主先是日耳曼人路得者著書譯解耶穌教旨人多信之王不謂然手著一書駁詰之王歿嗣王崇信耶穌教寬惠愛民教士有法舉國喁喁望治立未幾卒其姊馬利一作馬理嗣位贅西班牙王子爲婿禁耶穌教國人不悅明嘉靖三十六年女主以利撒畢卽位賢明知大體勤於政治英民頌之是時荷蘭不肯從天主教爲西班牙所攻英女主以兵助荷蘭西班牙因移兵伐英師船泊英港忽大風激浪船觸礁石半沈壞英人以小舟圍而殲之片帆

無返者。國勢益振。先是斯哥西亞別爲一國。一作師古泰元初英

卽蘇格蘭地

人取之。明中葉斯哥西亞人布魯斯復自立爲國。有女曰馬理姿。絕世。初嫁佛郎西王爲后。佛王早卒。馬理歸母家。父卒。嗣王位。選羣臣美丈夫爲夫。夫有別寵。馬理妬之。夤夜遣客殺夫。焚宮以滅其迹。而贅殺夫者爲夫時國人。已競尙耶蘇教。而馬理仍執天主教。又殺夫有邪行。國人圍馬理將囚之。越城而逃。募兵決戰。兵敗。降於英。英女主謂馬理犯倫。肇亂下之獄。馬理在獄十八年。復與獄吏姦。因逃去。英人捕得之。斬於市。萬厯三十一年。英女主卒。無子。斯哥西亞王熱給斯者。一作惹米士女主之姻也。英人奉以嗣王位。斯哥西亞復與英合爲一國。熱給斯辯給有才好。講禮制。時天主



教之徒結黨謀反。害公會殿下藏火藥。候王至。將轟殺之。會發覺。悉誅死。萬曆四十二年。查理第一立。性拘癖。好戲狎。不恤民隱。由是士民怨畔。公會皆散。稅餉無所出。王將與佛郎西戰。授甲無應者。師船未戰而退。順治四年。王募兵誅梗命者。國人與王戰。虜王弑之。時有大紳負才望。攝王政。以定國。自稱保護主。申明法制。參以變通。英人稱便。與西班牙荷蘭戰。皆勝之。攝政數年。倉庫充實。乃致位於先王世子。曰查理第二。爲人淫侈多內寵。惰於聽政。常與荷蘭戰。帥師者國之名將。入荷蘭內港。燬其戰船。王由此愈汰。忽倫敦大火。焚宮室民居。殆盡。已而瘟疫盛行。死者相枕藉。國勢頓衰。其弟嗣位。素習天主教。強民相從。民習耶蘇教。久不肯變慮。

王之相難也。渡海招荷蘭王爲主。荷蘭王率兵至。王奔佛郎西。康熙二十七年。荷蘭王入倫敦。卽王位。號曰威廉第三。雄武有大畧。法度嚴明。百司任職。積粟如邱山。蒐討軍實。悉成勁旅。由是威聲大振。方欲席卷西土。會嬰疾歿。無子。時日耳曼之漢挪瓦王若耳治第一有賢聲。康熙五十二年。國人招若耳治第一來英。奉以爲王。王初蒞英。不諳其俗。后爲英故王之女。習於英事。相助爲理。民大和。前王兩宗苗裔尙存。起兵欲圖恢復。王夷滅之。是時英商船通行四海。日益富強。與佛郎西交兵。屢戰勝。王卒。子若耳治第二立。修法度。別等威。定親疎。平訟獄。國稱大治。伐西班牙。獲全勝。又伐佛郎西。割其藩屬之在亞墨利加者。乾隆二十三年。若耳治第



三立舉動好循禮法。亦稱賢主。先是前明中葉。英人泛海覓新地。得北亞墨利加腴土。徙國人實其地。日漸墾闢。遂成沃壤。英人倚爲外府。後英國軍興連年。徵稅餉於亞墨利加。倍其常額。亞墨利加人不能堪。有華盛頓者。一作元興騰。又作瓦乘敦。據地起兵。英人以大衆攻之。八年不克。佛郎西與英世仇。舉傾國之師助華盛頓。英不能支。乾隆四十七年。與華盛頓和。聽其自立爲米利堅國。亞墨利加之轉音卽花旗國。沃土盡爲米利堅所割。僅餘北境荒寒之土。英國由是虛耗已而五印度貿易日盛。英富厚過於昔時。五印度者一名溫都斯坦。乾隆中年。東印度之孟加拉。因虐英商。英以大兵攻之。滅孟加拉。乘勝脅降東中南印度諸部。設四大部。孟加拉麻打拉。薩孟買亞加拉。麻喇甲息。

力諸番族皆歸統轄。英人遍設埔頭帆檣。雲集百貨。流通富饒。遂爲西國之最。嘉慶年間。佛郎西拿破侖得國。侵伐四隣。廢西班牙王。而以其弟王西班牙。故王求援於英。英起兵伐佛郎西。血戰累年。嘉慶二十一年。破佛郎西舟師於海峽。以九萬人登陸。進攻拿破侖。率十萬衆禦之。於窩德爾祿約期大戰。自昧爽至日暮。鎗炮之聲震天地。數十里烟氣迷漫。佛師大潰。英人乘勢逐北。斬首二萬級。禽拿破侖。以歸。流之荒島。西班牙王復其故國。由是英國威振西土。王晚年得狂疾。世子攝政。王卒。世子嗣立。有賢聲。早卒。道光九年。其弟嗣立曰威廉第四。初爲水師總統。以厚德御下。不沽名譽。及卽位。安民和衆。不喜兵爭。論者謂才能不越衆。而德量有



餘道光十八年四月卒無子有女不慧。遺命立兄女維多里亞爲王。卽今在位之女主也。立時年十八。贅日耳曼撒可堡侯世子博雅那爲婿。

英吉利三島以英倫爲主。其立國之本境也。南北約千里。東西廣狹不齊。西界稍見山嶺。而平地爲多。河道十餘。皆不甚長。田土膏腴。爲歐羅巴之上壤。地分五十二部。○東方之部六。首曰迷德勒塞斯。建都於達迷塞河濱。名曰倫敦。一作蘭莖東西南北皆七十里。無城郭。居民一百四十餘萬。殿闕巍峩。規模閎鉅。離宮別苑。綿亘相屬。文武百官之署。各有方位。街衢縱橫。穿貫百貨山。積景象之繁。華人戶之湊密。爲西國第一。大都會。都中有保羅殿堂。耶蘇弟子又有

西殿祀耶蘇教名師。兩殿營構最奇崛。有大書院。曰屋度。文儒所萃。有大肆。曰北明翰。鐵工聚焉。城外內港通海口。埔頭最大。每歲別國商船來者千餘。本國出入者三千餘次。曰諾耳佛爾克。曰素佛爾克。曰黑爾德佛爾。曰厄塞斯。曰岡比黎。曰諾耳克。佛爾爲織造呢布之地。岡比黎。曰有大書院。○南方地氣較暖。岡阜紆蟠。帶以清流。蔭以茂樹。每春夏林花嫣然。風景極清。分十部。曰根德。曰薩塞斯。曰蘇勒。曰北爾克。曰蘇當波敦。曰烏義爾德。曰索美爾塞。曰多爾塞。曰的彎。曰哥爾奴瓦里斯。根德爲大教師所駐。殿堂甚鉅。別有邑曰綠威。養軍士水手之受傷而年邁者。又有邑曰風素耳。有別館極幽雅。居王族之隱逸而習靜者。南界有港口甚寬大。



兵船商船皆修造於此。櫓立如林。○北方地形漸狹。別一區宇。分六部。其大部曰約爾克。有屬邑曰曼識特。爲洋布總聚之地。外通港口曰里味池。居民二十萬。米利堅販棉花之船皆收此港。在英國埔頭爲第一。西北列五部。曰蘭加斯德爾。曰威斯德謀爾。蘭曰岡比爾蘭。曰達爾威。曰諾爾。東北爾蘭北境有邑曰新堡。係石炭即中國之煤聚集之處。○中央之部十八。多平衍膏腴之土。曰支斯德

爾。曰德爾比。曰諾定昂。曰林哥爾內。曰捨羅波。曰斯達佛爾。曰雷塞斯德爾。曰魯德蘭。曰氣耳佛爾。曰窩耳塞斯德爾。曰窩爾維克。曰諾爾桑波敦。曰恆丁敦。曰瞞昌。曰哥羅塞斯德爾。曰疴哥斯佛爾。曰巴京咸。曰比德佛爾。○西方地形入海。別一區宇。總名曰威

爾勒士。一作瓦勒其地山嶺重疊爲英倫之後戶居民皆古時土番遺

種與英倫言語不同多以牧羊爲業人皆散處城邑甚少地產石

炭分十二部曰非林德曰敦比各曰該拿爾彎曰安哥勒塞曰美

畧內曰蒙德疴美里曰拉德諾爾曰加爾的安曰奔不羅各曰該

爾馬爾敦曰北勒各諾克曰加拉摩爾安

蘇格蘭

一作斯哥西亞又作師古泰

在英倫之北南北約八百餘里東西廣狹

不齊古時別爲一國明萬曆三十一年合於英爲一國迤南土田

肥沃迤北磽瘠多鹵斥其民習勤耐苦善於謀生俗儉嗇不妄費

經商通四海積貲多在數萬外故地雖寒瘠而多素封產石炭最

多每歲收炭稅百餘萬地分三十三部○南方十三部曰壹丁不



爾厄。

一作以丁堡

蘇格蘭之舊都也。今爲會城。在內海之南岸。街衢整

潔。萬厦雲連。爲北方大都會。曰林利德厄。曰合丁堡。曰北爾維克。

曰稜非律。曰哀爾。曰烏宜。曰敦。曰拉拿爾克。曰比波勒斯。曰塞爾。

給爾克。曰羅哥斯。不爾厄。曰當非利斯。曰給爾加德比里至。○中

央十四部。曰亞爾。曰勒。曰比干德。曰內壹爾那。曰慕來。曰邦弗。曰

亞北爾。曰迷牙爾。曰安孤斯。曰白爾斯。曰發壹夫。曰見羅斯。曰

加拉克馬南。曰斯德爾零。曰當巴爾敦。加拉克馬南爲洋布總聚

之地。出運別國。每歲得價千餘萬。○北方六部。曰爾哥內。曰該內

斯。曰蘇塞爾蘭。曰羅斯。曰哥羅馬爾的。曰音威爾內斯。

阿爾蘭。

一作耳蘭。又作壹爾蘭大。

在英倫蘇格蘭之西。海港隔斷。別爲一島。南

北約七八百里。東西約四五百里。古時爲土番部落。英人於南宋時收服之地。多瀦澤。河流甚短。土亦磽瘠。產石炭甚富。又產鉛錫。銅鐵。其民粗豪。閑爽。飲酒歡會。無遠圖。英人募以爲兵。臨陣敢於衝突。以退縮爲恥。故英之水陸將領。半皆阿爾蘭人。俗尙天主教。不肯從耶蘇教。英人惡之。而不能使之改革也。地分三十二部。○東方十二部。曰都伯林。一作土北林其會城也。建於但士江濱。下接海口。水深便於泊船。城內外居民十萬餘。貿易繁盛。景象極豪華。曰勞斯。曰壹斯德迷。曰烏宜哥婁。曰威哥斯佛爾。曰幾爾給尼。曰加爾婁。曰幾爾德壹耳。曰固音斯高翁的。曰京斯高翁的。曰威斯德迷。曰郎佛爾。○西方五部。曰勒德靈。曰斯黎各。曰羅斯哥滿。曰馬



約曰加爾威。南方六部曰哥雷宜爾曰里摩黎克曰給黎曰哥爾克曰窩德爾佛耳曰的卑拉黎。北方九部曰安德靈曰刀尼曰亞爾罵疴曰的倫曰倫敦德黎曰德內加爾曰非爾馬那疴曰加彎曰摩那安。

英國附近海島甚多。迤南最大者曰威地。風景極清。近佛郎西海中兩島曰額西曰額耳西。在西方者曰葫島。附近蘇格蘭曰撒多島。地氣寒甚。穀麥不登。迤北羣島尤寒冽。積冰雪者歲居其半。其民捕魚爲食。

英吉利三島物產。石炭之外。兼產銅鐵錫鉛窩宅礪砂。馬牛羊最多。土宜二麥。收穫甚豐。然人滿食不足。資運糴於他國。織布者四

十九萬餘人。其機以鐵爲之。激以火輪。關捩自能運動。是以工省而價廉。每年用棉花四十餘萬担。皆從五印度米利堅運入。織造大呢。羽緞。嗶嘰。最多。又能織絲緞。亞於佛郎西。絲由中國。意大里運買。鎗炮。刀劍。鐘表。以及日用各項器皿之工。約三十萬人。每年各項貨價。約值一萬萬餘兩。街市之中。衽帷汗雨。晝夜往來。如織其商船。四海之中。無處不到。大利歸於商賈。而工則貧。

英國之制。相二人。一專司國內之政。一專司外國之務。此外大臣一管帑藏。一管出納。一管貿易。一管訟獄。一管璽印。一管印度事務。一管水師事務。各有佐屬襄助。都城有公會所。內分兩所。一曰爵房。一曰鄉紳房。爵房者。有爵位貴人及耶蘇教師處之。鄉紳房



者由庶民推擇有才識學術者處之國有大事王諭相相告爵房聚衆公議參以條例決其可否復轉告鄉紳房必鄉紳大衆允諾而後行否則寢其事勿論其民間有利病欲興除者先陳說於鄉紳房鄉紳酌覈上之爵房爵房酌議可行則上之相而聞於王否則報罷民間有控訴者亦赴鄉紳房具狀鄉紳斟酌擬批上之爵房核定鄉紳有罪令衆鄉紳議治之不與庶民同囚禁大約刑賞征伐條例諸事有爵者主議增減課稅籌辦帑餉則全由鄉紳主議此制歐羅巴諸國皆從同不獨英吉利也又英國聽訟之制有証據則拿解到官將訊先於齊民中選派有聲望者六人又令犯罪者自選六人此十二人會同訊問辨其曲直然後聞之於官官

乃審訊而行法焉。

英吉利本國境土止三大島。其藩屬埔頭皆在數千萬里之外北

亞墨利加一土。英人於前明萬厯年間探得之。生聚墾闢經營二

百餘年。後南境為華盛頓所割據。僅餘北境六部。詳亞墨利加圖說乾隆

初年復得五印度數千里膏腴之土。詳五印度圖說由印度海之東岸漸

拓而南。在緬甸之西界有阿喀喇等埔頭。迤南為麻喇甲。再東南

為息力。俱詳南洋圖說又由緬甸之西北開阿薩密部。南洋之極東南有

大島曰澳大利亞。又名新荷蘭別有兩島曰撈日倫敦。又名新西蘭皆英人

新開之土。另有圖說此外則阿非利加之西界有獅山諸地。詳阿非利加圖說

南亞墨利加有特墨拉拉諸地。詳亞墨利加圖說其餘所屬小島不可勝



數。

按英吉利。負然三島。不過西海一卷石。揆其幅員。與閩廣之臺。灣。瓊州相若。即使盡爲沃土。而地力之產。能有幾何。其驟致富。強。縱橫於數萬里外者。由於西得亞墨利加。東得印度諸部也。亞墨利加。一土孤懸宇內。亘古未通聲聞。英人於前明萬厯年間。探得之。遂益萬里膏腴之土。驟致不貲之富。其地雖隔英倫萬里。而彼長於浮海。視如一葦之杭。迨南境爲米利堅所割。所餘北境雖廣莫。而荒寒類中國之塞北。燕支既失。英國幾無顏色矣。五印度在中國西南。卽所謂天竺佛國。英人於康熙年間。在孟加拉購片土。造屋宇。立埔頭。乾隆二十年。滅孟加拉。乘勝。

蠶食印度諸部。諸部散弱不能抗。遂大半爲其所役屬。其地產  
棉花。又產鴉片烟土。自中國盛行之後。利市十倍。英人所收稅  
餉。五印度居其大半。失之桑榆而收之東隅。抑何幸也。英人既  
得五印度。漸拓而東南。印度海之東岸。遍置埔頭。阿喀刺達至  
取之緬甸。麻喇甲息力。卽新坡易之荷蘭小西洋。卽印利權歸掌  
握者八九矣。再東則中國之南洋諸島國。惟呂宋屬西班牙。餘  
皆荷蘭埔頭繁盛。如噶羅巴。卽瓜哇衝要如馬尼刺。卽小呂宋英人未  
嘗不心豔之。而他人我先。無由憑空攫取。然往來東道。以兩地  
爲逆旅。西與荷不敢少迂也。澳大利一島。孤懸巽維。廣莫無垠。  
野番如獸。英人亦極意經營。欲收效於數十年。數百年之後。至



如亞非利加之獅山

又名西爾拉里阿尼

辟荒穢而取材南亞墨利加之

特墨踐塗泥而耕作蓋四海之內其帆檣無所不到凡有土有  
人之處無不睥睨相度思朶削其精華而目前之倚爲外府而  
張其國勢者則在於五印度其地在後藏西南由水程至粵東  
不過兩三旬蓋英人之屬地久已近連炎徼而論者止知其本  
國以爲在七萬里之外也

英吉利本國地形褊小而生齒最繁可耕之土不足供食指之  
什一北亞墨利加未分割之前英民無業者率西渡謀食迨米  
利堅割據之後英所餘北境之土寒不可耕雖得五印度廣土  
而其地本有居人並無曠土英人流寓雖多終不能反客爲主

故汲汲於尋新地。近年得新荷蘭大島。誅鋤草萊。流徙罪人於此。貧民無生業者。亦載往安插。移民於八萬里之外。其爲生聚之謀。亦可謂勤且勞矣。

英吉利歲入稅餉。除還商民利息外。每年約得二千餘萬兩。所出亦二千餘萬兩。本國額兵九萬。印度英兵三萬。土兵二十三萬。謂之敘跋兵。兵船大小六百餘隻。火輪船百餘隻。其兵水師衣青。陸路衣紅。重水師而輕陸路。專恃鎗炮。不工技擊。刀劍之外。無別械。英吉利兵船極大者。安砲一百二十門。次一百。次九十。次七十。次六十。中等者。安砲四十四。次三十六。次二十八。小者。安砲二十。次十。次六。其船大者三桅。長十五六丈。次者二桅。長約十



丈。船形平直。兩艤高六七尺。船腹入水深者三丈餘。淺者兩丈餘。小者丈餘。包以銅片。厚一二分。防蟻蟲蝕船也。船底有三龍骨。正中者高三尺許。平而直。兩旁者相距尺許。低於中龍骨尺許。船底厚約七八寸。表裏兩層。故謂之夾板。釘極密。以銅爲之。長尺許。舵甚小。在中龍骨之尾。長與中龍骨齊。桅三節。在根者圍約三尺餘。長約十丈。入船腹者三丈餘。直抵龍骨。在外者七丈餘。中一節圍約尺餘。長約二三丈。上一節圍不及尺。長止丈餘。每節相接處有木架。可坐數人。持儀器審方向。又可懸炮擊遠。帆分三幅。以布爲之。卷舒極速。繩索密如蛛網。桅兩旁有繩梯。用以登桅。船首有桅。長二三丈。其勢斜立。亦施篷。以免風。謂

之頭鼻。砲位少者一層。多者兩層至三層。上一層在船面。下兩層於船旁開砲洞。人在船腹。其船行大洋中。不畏風浪。其篷關。振靈巧。能收八面之風。惟入水過深。最畏礁石。一閣淺卽立敗矣。船料皆番木。或黃色。或赤黑色。皆極堅紉。船之內外。時時拭滌。皆極光澤。繩索拭以油。使其柔紉。隔數日輒重拭之。俗傳西洋砲皆銅鑄。非也。銅砲亦有之。而不如鐵砲之多。其鐵砲鎔鑄精凝。內外滑澤。形粗而短。三千觔者。長纔五尺許。砲架不用輪。上下兩盤。施鐵條。進退左右。拽之以繩。極其靈便。砲彈極圓滑。亦時時以油拭之。防綉澀也。每砲一門。兵六人司之。鳥鎗皆自來火。另有利刃長尺餘。以鞘插之於腰。敵迫不及放鎗。



則套刃於鎗梢。以當戟刺。

火輪船。大者如三桅船。小者如兩桅船。船之後半。上爲水櫃。下列火門。或五或九。火門之內。以柴燃煤。水櫃之上。兩銅管粗尺許。灣折而下。至船底。承以兩木桶。高五六尺。圍七八尺。木桶之前。又接以雙鐵管。曲折灣環。達於輪軸。

管內貯水銀。不知如何運用。

火燃水

沸。熱氣從銅管入桶。桶蓋扇動。熱氣貫入雙鐵管。宛轉達於輪軸。以激動之。輪在船之兩旁。爲鐵圈三層。橫施鐵板。畧如南方灌田之水輪。外以木匣護之。望如半月。船面有大鐵筒。高二丈餘。出黑烟。以透火氣。又小鐵筒一。高丈餘。出白蒸。以透水氣。船將行。先燃火。約兩三時候。水沸而開船。船內有銅尺二。施於兩

柱。推之向前。則輪前轉。推之向後。則輪倒轉。推之依柱。則輪不行。船之行也。輪激水如飛。瞬息不見。一晝夜約千餘里。船面立小桅二。遇順風。則施篷以助輪。風不順。則專用輪而不用篷。船面設炮與夾板同。惟船腹不開砲洞耳。火輪船之製。四五十  
年前始創爲之。先是歐羅巴諸國。織布多用火輪機。能者推廣其法。遂造爲火輪船。近年米利堅又推廣其法。造火輪車。而鎔鐵爲路。以速其行。亦可謂精能之至矣。

英吉利之人。身材長大白皙。鬚髮與睛。或黑色。或黃赤色。心計精密。作事堅忍。氣豪胆壯。爲歐羅巴諸國之冠。其語音雜佛郎西日耳曼。其文字用二十六字母。

佛郎西用二十四字母。英益其二。餘二十四字母與佛同。

或二三



字合爲一音。以漢字譯之。斷不能昭合也。舉國尙耶蘇教。耶蘇之書。名爲聖書。人藏一帙於懷袋。

英吉利官員常服之冠。圓筓平頂窄簷。燕居多用軟胎貼簷。畧如中國之如意巾。禮服之冠。以黑絨爲之。厚一指許。頂如斧刃。前後伸出長近二尺。畧似中國之雨帽。雖盛暑亦著此。然入門卽免冠。不能久戴也。武職有武功者。頂上綴白羽數十莖。貼身之衣束革帶。外襲之衣長過膝。用天青呢。窄袖。敞前襟。文職領袖與袴皆以銀線盤作花紋。武職兩肩掛銅獸面。貴者以金。下綴金線纓絡。職大者。獸面之下。拖金絲繩長數尺。綰結盤於獸面。職卑者僅一肩掛獸面。文職帶劍。武職帶刀。鞘皆用白鐵。飾以金珠象牙。鏤製絕



精刃雪亮如敷水。柔可盤圍腰間。伸之則直。禮服之刀劍皆無鏃。謂之太平刀。武員革烏踵。後有銅釘上屈長寸許。

英吉利之俗。男女婚配。皆自擇定。然後告父母。至婚配之日。耶蘇教師誠以善言爲之祈福。男以戒指約於女指。親賓送之入房。歡宴而散。其俗男女皆分父母之產。男不得娶妾。犯者流之七年。男恆聽命於女。舉國皆然。

英俗賓主相見。以脫帽爲恭。各伸右手相握爲禮。除跪拜天帝救世主外。見君王亦無叩頭之禮。尊卑雜坐。無上下左右之分。每宴會合座。先立起。持杯祝君王壽。頌以好詞。一飲而盡。然後輪流相敬。敬是人。則是人不飲。內一人頌好詞致祝。合座擊節呼贊之。贊



畢。合座皆醺。

英俗早餐皆餅餌饅頭。沃以牛油。飲茶與加非。參以牛乳白糖。午飯謂之大餐。牛羊肉或燒或炙。飲葡萄酒。蔬菜不甚用。惟重荷蘭薯。





Folio  
PL 2724  
.H86  
v.5



16-1  
24

Library of the Theological Seminary,  
PRINCETON, N. J.

Division.....

Section .....

Shelf.....

Number.....

IV-1